



Senin, 25 Oktober 2021

Ogen: Perbahanen Rasul-Rasul 17:26



“Nggo Leben ItetapkenNa”



Sura-sura Dibata nandangni doni enda seh kal belinNa. Mulai kin doni enda itepaNa seh nggo lit isina kerina, Dibata tetap ersura-sura mpekena-kena doni enda. I bas mpekena-kena doni enda, tentuna lit cara Dibata guna mpesikap sie kerina. Ise kita si pernah tersirat bas ukurta, engkailah maka aku tubuh i doni enda Tuhan? Atau ugalah maka melala lalap perbebenku enda Tuhan? Penungkunen si bage rupana turah sabap terjadi penolaken bas ukurta i bas keadan ntahpe situasi si reh si la bagi ukurta. Atau pernah nge kita rukur, seh kal ulina Dibata e nggo nepa aku ku doni enda? Bali bagi tema-nta sendah *nggo leben itetepkenNa*, enda me si jadi jawapen i bas piga-piga penungkunen adi turah penungkunen i tengah-tengah situasi si la bagi ukurta.

Dibata nggo leben netapken kita tubuh bas doni enda, alu erbage-bage kegeluhen. La mungkin seri kerina kerna ingan, nanam, ras kondisi kegeluhenta. Ieteh Dibata uga batas ras kemampuan kita i bas ndalani kegeluhen enda. Sabab ope denga itetapkenNa nggo leben irancangNa kerna kegeluhenta enda. *Alfa* ras *Omega*, awal dan akhir kerna kegeluhenda nggo lit i bas rancangan Dibata. Manusia la banci maba sura-surana i bas ngaloken rancangan Dibata e sabap nggo leben itetepkenNa.

Kitab Perbahanen Rasul-Rasul 17:26 enda me sada bukti uga Dibata nggo nikapken kegeluhenta ope denga kita ngaloken kegeluhen e. Emaka, marilah kita megenggeng i bas ngaloken kegeluhenta. Amin gia rusur la bagi ukurta kerna kegeluhenta enda, mari megegeh kita ngalokenca ras pindolah gegeh e arah Dibata nari, sabap dalam arah Dibata nari me maka ibahanna megenggeng kita ngalo-ngalo si la bagi ukurta ndai. Ersikaplah kita katawari paksa pe. I bas kinigenggengenta ngalo-ngalo kegeluhenta e pasti isampati Dibata kita. Teklah kita, dalam Dibata e, cara Dibata e nge kata tuhu guna mpesikap kegeluhenta.